

墓碣銘
墓誌銘

清陰集
十一

清陰先生集卷之三十二

墓碣銘 十一首

黃海道觀察使閔公墓碣銘并序

在昔我 中明二廟之際奸臣盜秉管蒯士林清
名直節之士於是迺顯若櫟菴閔公尤其履艱能
貞嶠然無滓者也公諱起文字叔道姓閔氏櫟菴
號也驪興人高麗平章令謨之後連世有人累公
累卿迄為鉅族祖諱師騫忠清道觀察使考諱源
承政院右副承旨妣奉化鄭氏杜稷令叔澈之女
領議政文洞之孫以正德辛未十二月生公蚤孤

母夫人教誨有方自幼穎敏孝謹學業日就弱冠
中司馬聲譽謁蔚所交游皆一時勝彥有陳宇者
與公齊名相與為居業奸臣金安老擅行威福世
方趨羶聞公一隊人見有名稱欲令出其門下遣
其子請交公及諸友不肯引接宇嘗指斥顯言其
惡安老銜之次骨必欲得而甘心嗾其黨論以謗
訕文致若治逆者鞫於 殿庭宇慷慨對簿已常
言安老罪惡不預諸人事遂置宇極刑餘並流竄
公配鴻山三年丁酉安老誅死放還庚子登文科
選補槐院即薦入史館為翰林尋拜弘文館正字

陞著作移世子侍講院說書還玉堂爲博士陞
副修撰自是歷敷臺省兵曹則佐郎春坊則司書
文學玉堂則修撰校理師儒則直講諫院則正言
者三獻納者拜憲府則持平者二東銓則屢薦未
除士論以爲歎 中宗 仁宗連歲上賓 明宗
初卽位 大妃垂簾聽政 妃兄尹元衡素與
仁廟舅尹任相仇嫉至是憑藉宮掖乘時逞憾結
鄭順朋李苞林百齡許磁等謀起大獄首殺任及
兩大臣士類不附己者指爲黨逆爲網打計無得
脫者初元衡托稱密旨誅脅大司憲閔齊仁大司

諫金光準會諸臺諫議罪尹任諸臺諫皆不從至
欲反劾之奸黨大懼陰啓大妃掖幼主夜開
忠順堂召芑等議先加箝制將獻納白仁傑下獄
盡罷諸臺諫公亦以持平與焉何左調開城府
都事明年爲兵曹佐郎厯容於朝丁未辟書獄起
名官聞士悉被竄逐公謫林川辛亥遇赦放還闔
門靜居不事交接時元衡勢益熾呼吸霜露有顯
寮來嘗公瑞原惜君久屈意欲收用盍往觀之公
示默其人再三勸之終不對瑞原卽元衡勲封也
聞者爽然乙丑朝廷改垂簾政賜環清流起公

為師儒於是公之居謫已二十年士林聞公來無
不懽忻相慶冀其大用有戚里新貴人陽浮慕之
假手談迫欲要公為客使習於公者通慫慙公不
一往出為延安府使久之拜檢詳舍人歷弼善應
教輔德典翰陞直提學特授副提學移同副承
旨序陞左副移大司諫大司成會吳健奉使湖南
乘傳越疆言路糾劾健多要路跡驟得時譽疑公
主其論頗恨之右健者從而齟之久擯散地甲戌
復入銀臺還左副移禮刑兩曹叅議拜黃海道觀
察使尋以左承旨徵還九月三十日至開城病

卒壽六十四夫人慶州崔氏新羅文昌侯致遠之
後成均生負滄之女先公歿葬于衿川白巖里公
之先兆內至是穿其墓而合封焉公天資端雅持
論勁直少負重名士友間論正人端士宜居諫諍
論思之地者必推公為先不幸當權奸用事之日
荐遭坎窞桎梏析楊湖潭瘴厲之味靡所不更而
松栢之操薑桂之性百折不挫終始為公之屈伸
識者以公位不滿望壽不滿德用不究材為千古
恨公有三丈夫子長泣 贈左承旨次泊別坐次
溶生負庶出四人男澈洛達女郡守韓守慎妾泣

娶宗室泰仁副守琯女生一男二女男有孝文科
狀元戶曹正郎 贈吏曹判書女適金纘祖壽職
通政次適慎汝賢忠義衛有孚生四男曰聖後登
死無后曰聖徒曰聖徽文科歷任名藩方居八座
以才諳稱朝廷曰聖復縣監洎娶縣令高千齡女
生三男二女有定有義有信進士女適高敬信中
見龍進士妾子一人有末有定無子以弟之子聖
與為子有義一男聖中有信二男聖與聖傳落娶
宗室永川君眉壽女生一男有慶文科由侍從官
至敦寧府都正生二男聖清聖任察訪澈一男有

賢武科通政洛一男有善達二男有成進士有章
諸孫曾玄及壻多不可盡錄別有記公歿後七十
餘年拒楹之刻闕焉曾孫今大司寇聖徽慨然謀
所以不朽者問銘於余余生後故老長者無在家
乘逸於寇公之言行可傳於後者未免闕莽矧八
十棄筆研哉固辭不獲猶叙其表著者而係之辭
辭曰

驪江之水清且直兮我公之操如其清如其直馬
巖之石峙于江之干兮公之節樹孤砥於揚瀾山
川之氣鍾於人傑兮為國家之星與日七十有四

載方建隆竭吁嗟乎公名方滿後世

兵曹佐郎宋君墓碣銘

并序

吾友恩津宋永叔奉法守職勤事而死余未嘗不
思其賢而惜其不可作也旣而寇難子死於節國
耻弟死於慨一家父子兄弟卓然並著於世爲國
之光蓋其素砥礪秉行辟立千仞之志蓄於躬而
成於家也永叔之先故名族麗代以來世有聞人
至大父宗廟奉事龜壽以善喪聞從祖都御史
麟壽名行表一世與妹婿東洲成悌元先生同志
講道人號其居三賢間奉事生應期儀賓府都事

是爲君之考妣曰李淑人判書潤慶女舉五丈夫
子第四曰邦祚永叔其字也始琬辟上有光如懸
鑑五日乃滅人異之自幼沉嚴寡言笑言必有倫
七歲隨父青山任所見有被杖者輒愍然曰彼老
與嬾孺最可念辭意動聽罪常減等邑人稱此郎
君慈仁真天性也十二李淑人歿依於庶母執喪
如成人不以釋廢禮甲申丁外憂庚寅中進士壬
辰倭警與庶母及弟妹避地永同艱難之際履道
不爽從縣監韓明胤召集義旅募謀檄筆多從君
出家人咸挽止曰獨不爲十口計耶君奮謂君父

蒙塵此何時而暇顧私乎會 天子大發兵征倭
君仲氏知禮君自行朝銜委諭南方諸道遇於
懷德鄉里宗族喜得相見爭欲留而觴之君獨曰
君命既不可宿况百姓日望救兵今者 王師將
屆宣布何可晚一日也知禮君欲言君于其外舅
太宰李公除官救貧君誦王文正語以對乃止亡
何君遘厲甚危季弟甲祚聞之奔視君憂其久瘁
染必不救詭言他故使越疆求濟於所親比往返
疾已損兄弟賴以俱全時兵革未息衿紳之徒盡
廢講學君與季弟讀書論道行誼相勉勵期以不

負先訓尤存於辭受非其道一芥不取丙午登文科權知承文正字族父昵權倖方貴用事要與已合不應戚畹之醜而顯者為子求婚啖以羨遷怒斥之陞正字兼訓練都監郎管攝五營兵兵多市井油滑人人托貴勢爭為便身圖君一切裁以法軍中凜然稱肅由著作至博士時槐院揀坊大壞弊將難捄君慨然持古道不撓士論重其方格而同寮固已目攝之尋陞典籍出考嶺南鄉試大振風裁絕祛私意多士翕然無異言還除金郊道馬丞槐院為崇也君無幾微色悉心營職郵政大舉

即有權力者莫能枉其正倖相家子奉使犯法即
舉劾之反嗾言路屈君廷尉問對簿即釋郵卒至
有涕泣稱慕者久之拜兵曹佐郎未幾為修劬者
所中又出為高山道馬丞在驛三年聲實愈於金
郊時輿頌載塗方伯舉實褒績見必加禮曰宋督
郵國器豈可以屬吏蓄蓋見其有過人處也秩滿
還家不交人事自號習靜所居饒山水時出徜徉
翛然若遺世者會度支財用匱設調度使署君從
事力辭不獲既赴務從便宜擇堪事吏任之事以
辦集是時王師將討建夷約我掎角西閩須得

強佐人無肯行者乃以君為平安道兵馬評事名為材君而實欲啗之適有上國聘使之行迫令到界上攝御史驗包以聞君暑月去蓋一馬馳往服御簡朴見者歎息先是譯輩視御史弦韋用方便計以遂其私中道竊覘君自治相視愕眙曰難哉夕至龍川館食夜示憊譯輩佯驚咸集若視疾者已而遂卒實萬曆戊午五月二十五日君素剛無疾病聞者皆疑之竟莫知其故事聞命給扶護送諸孤以喪歸葬于永同耆歲里新卜某向之原君生於嘉靖丁卯至是年五十一遠近聞之

無不咨嗟相吊恨世之不能容也君天性篤至孝
友敦睦言論慷慨義所不可百折不挫一時儕類
多以剛直峻潔見稱而薦論者推君居前在騎省
故人有黨奸者就君望其踈絕君責以大義其言
斬截人所不堪聞屬垣者至為吐舌果被螫以去
其下理也或諷令少徇君應曰不負心所以不負
君也亡變易少受戒賢毋終遠女色析箸讓財一
遵先志待庶母終身不衰古稱內不愧家外不愧
國宿不愧衾者君近之矣君歿後以長子原從勲
贈吏曹叅議君贅於鄭氏父谷軍資監正祖思顯

司憲府持平女範純備後君七年年五十五歿祔
葬君墓有四男二女男長時榮主太僕簿即丁丑
殉節者也次時瑩大君師傅次時琰時倓長女壻
金自鍊次女壻尹長卿皆業儒時榮二男二女基
隆基崇時瑩四男二女基善基美基進基胤二家
女皆嫁為士人妻時琰三男基厚基久基阜時倓
無子以基胤為後金自鍊三男三女尹長卿未育
君歿二十八年墓石未有文時倓以其從兄持平
時烈狀請余銘余謝老病三至請益勤終不忍辭
略採十一為叙而銘之銘曰

既嚴以剛又正而公今人與違古人與同道勝官
屈誰塞誰通三賢之門義聲隆隆趾美傳德令譽
無窮片石足徵何必鼎鍾

議政府領議政揪灘吳公墓碣銘并序

崇禎丙子孟春領議政吳公卒於位法得樹石神
道而顧言曰吾遭遇聖明不得挽回世道於國
無功於身無德死葬勿立碑凡請謚求挽借人掄
揚之事並已之諸孤不敢違既而謀於所親咸曰
然雖然禮稱先人有善而不傳不仁也蓋圖於先
友之質而不華者略其細志其大於短碣乎書之

也遂來請於余辭不獲謹按公諱允諱字汝益別號揪灘其先海州人有諱仁裕仕高麗為軍器監十二傳而為公之高祖世有衣冠至公始大顯遂贈皇考繕工監役諱希文議政府領議政祖考司憲府監察諱景閑左贊成曾祖考司瞻寺主諱諱三貞吏曹判書議政公業文不遠家行純篤鄉里推為誠長者娶延安李氏文康公石亨之後郡守廷秀之女最名有婦德嘉靖己未十月生公在娠有異夢生而端穎異凡兒八歲大夫人病思異味不得公徧求以進家人悉驚以為誠感既冠學于

成牛溪先生先生重其操履待之有加公不以科
舉為意為親屈意就之壬午中司馬居泮官尤為
士友所慕授 英陵叅奉稟官又授 奉先殿叅
奉壬辰之亂鄭相公澈體察兩湖署為從事甚重
之相府幕僚之用蔭官自公始癸巳授典設別提
不仕授侍直副率轉衛率大臣薦才堪守令除平
康縣監鄭公述為方伯以公事忤意及相見喜曰
真金玉佳士也自是每與論學致敬重焉丁酉登
文科別試在縣五年境內大治亡何棄官歸徵拜
侍講院文學移弘文館副修撰又移司書為修撰

為吏曹佐郎知製教副校理牛溪被奸黨誣詆
公以門人自劾辭侍從適為直講特授鏡城判
官公不以遷客自居悉心營職治理為一道最甲
辰遭大夫人憂與諸弟廬于墓下哀毀踰制及侍
議政公必修溫顏不敢以戚進服除典籍司藝用
薦為安州牧使公所在有異政褒錫相繼不可勝
紀去後民輒鑄銅為碑期於無泐戊申親年七十
適歸以御史巡按北道還為司導正移左通禮會
有南顧憂特拜東萊府使弊祛信孚民夷皆悅
陳䟽歸養為戶曹叅議移同副承旨師誣未雪䟽

辭 不許序陞右副 特拜忠清道觀察使大臣
以為宜置左右仍陞左副鄭仁弘恃恩恣睢上劄
侮毀晦齋追陶兩賢公與同僚極陳尊賢斥邪之
意忤旨出為江原道觀察使扶滿還為僉樞在任
剔民瘼釐貢案修 魯山墓定其祭式獎振儒風
黜貪墨吏人情翕然癸丑朴應犀誣告獄起一時
名流多被逮皆公平生所賢重杜門削迹不與人
事為養求為廣州牧使明年議政公捐館廬墓如
前喪服除分承旨丁巳差回答使使日本自關白
以下聞公名無不敬待歸本國俘擄百餘人及還

所遺國贖盡却之後倭使來問貴國如吳公比幾
人答未易數倭使笑曰貴國雖盛人才定不過一
人李爾瞻謀廢 母后廷議之公辭甚嚴正脅百
僚伏閣亦不赴臺諫請遠竄待命于郊者二年壬
戌 光宗皇帝即位超二階越海進賀時海路多
梗人皆畏避公無少動及在海上遇颶母舟幾覆
衆無人色公危坐此筆記詩晏然如常度公於同
隱先生彌甥也使日本朝金陵適與之同歲月而
其忠信自伐夷險不貳又無不同人蓋奇之公既
還 國家改正登庸舊臣遂拜公大司憲改紀之

初務用重興公持論和平人多悅服兼帶經筵
春秋同知事元子輔養官時議處廢世子臺諫
請斷大義公獨自劾前所陳幾誤聖德適為右
叅贊兼知義禁府事上臨筵問色聞得三戒孰
難公對色最難上曰子則以戒得為難公復對
不必蠱心妖物夫婦之間或不能相接以禮是亦
不善於戒色也上改容曰卿言然矣公自先
朝出入經幄每當進講之際輒先事規諷上虛
心傾聽拜吏曹判書辭不許公秉心公正知其
人不稱職雖親不用苟賢也疎遠不遺鞠獄勞加

一階李适叛虜 駕公州進崇政 上欲錄勲公
啓止之宮殿燬於兵 移御光海時所創別宮制
度奢麗公因進見陳鑑戒之意病解銓長知敦寧
燕世子右賓客刑曹判書 世子加元服進崇
祿禮曹判書未久復長東銓公益加振滌選用知
名士 恩澤除官者稱得進擬有 嚴旨公不安
免拜知樞燕悉如故俄拜右議政懇辭 御批欲
濟時艱捨卿伊誰公以為 上富於春秋向意經
學庶幾有奮然進益之望黽勉出謝丁卯寇深陪
慈殿 中宮先入江都虜要盟請去 中朝正朔

公極諫不可及盟虜固請上親莅公涕泣極諫
只令諸大臣同盟逮奏聞多沒其實公言天
朝有父子之義言不可不實後果有蜚語而得免
投杼者公之力也還都陞左議政兼世子傳
朝廷增修江都行殿公請撤廢闕殿材以省民力
許迺等謀逆伏誅命錄諸推官功公力辭只拜
鞍馬之賜陞領議政上入左相金瑬言竄羅
萬甲逮問金堉公力救得減律上劄勸上聖王
之學專功於大學反覆致詳上手札褒答又勸
世子讀書以玩索體驗為要克己謹獨為務尤致

意於為善不誠好名無實蓋欲隨症下藥不為空
談世子亦嘉納穆陵改葬虞祭百官將以吉
服行事公據禮請用素服從之時議章陵追崇
典禮公力言其不可與議禮諸臣不合上屢下
嚴旨公確然不變具見國史公以言不行辭適為
領敦寧府事先年請暇飾墓多事未行至是遂行
臨行以朱子甲寅封事李文純敦聖學劄子傳寫
投進未復拳拳勿以聰察事務為能勿以維持一
世為足褒答既行連疏乞解不許遣近臣敦
諭夏震仁政殿及仁穆王后疾篤不得已入京

山陵畢往浴椒井仍歸丙舍秋復拜左議政一敦
諭益懇公力疾入謝或疑進退數數公曰上遇
灾思治此正乘機開導之時他不可顧也元宗
之祔廟也公實領都監之事人問其故公以為退
崇非古則當初力爭大臣之責也朝廷定禮則承
命供職臣子之義也所見蓋如此云亡何雷雨
穆惠兩陵崩毀誤傳震擊公承命往審還啓雨
也非震也於是言者咎公諱灾公引入不出上
以羅萬甲倡言下教罪萬甲公上劄救解且以
言路為戒萬甲得免重譴上講大學詩傳公於

逖中陳講學資益之要其言甚切又因下教言人君和平中正以消朋黨不可先有係着又言

陵寢宜遵祖宗儉制大君家舍太侈裁減上

嘉納仍命所司施行訛言陵變不息請再審

不許公出居江上辭職下教深斥訛言之人辭

旨太峻公復上劄陳戒上覺悟曰卿言是也予

過矣儒生蔡振後等上疏侮慢栗谷牛溪二先生

公復為申卞乞退章三十上不許敦諭入城自

此尤無意世事不與人接深坐一室案上只留近

思錄等書仁烈王后喪為摠護使勞悴已甚或

勸辭疾公曰一君母未葬豈可言病杓禮曹以自上服制不杖期爲定公引古禮延正其失疾漸瘳近臣輩降御醫留視內賜藥物相屬於道遺命治喪悉用儉素子弟進藥搖手却之正席東首屏婦人戒內外勿哭靜而俟之至正月十九日告終于京城之東第春秋七十有八訃聞上輟朝三日吊祭如禮王世子致禭葬事官庀哀榮之禮盡矣用是年四月窆于龍仁縣慕賢里亥向之原與夫人墓同原異穴夫人系出慶州高麗李益齋齊賢之後僉正應華之女有二男二女長達天

郡守次達周衛率長女壻鄭斗望次女壻觀察使
具鳳瑞側室三男三女長達朝次達遠天次達士
達天二男二女長道宗次道隆長女適黃某餘幼
達周二男一女男幼女適李綴達朝二男四女皆
幼達遠一男道全達士二男二女皆幼內外曾孫
男女若干人公天資粹美自然寡過平生不為新
奇高遠之論能守師說飭躬砥行為世模楷號稱
名臣詩云溫溫恭人維德之基其公之謂歟銘曰
若稽古籍觀人有術操履之惇確聲容之和悅本
原為實地事功為粗跡金石匪固丹青匪色儒門

德行後死永式

慈山郡守沈公墓碣銘并序

少司徒沈君狀其王父母行請銘墓石辭老病歲
中兩以書至曰前既有成言矣幸毋已諾於逝者
余終不得辭按公諱宗忱字士誠青城伯德符之
後祖諱光彥左叅贊考諱錦司憲府監察妣驪興
閔氏判官希說之女青城之沈為世甲族而殿中
公娶於禁嚮之門公之先夫人與尚憲先君子俱
系宣陵外裔譜聯玉牒親為再從敦睦之風仍
世不替公遇我特厚開示悃悞不以少長為間也

公之兄弟七人倫序居次伯判決公喜交游臧否
人物弟利川君翩翩豪舉有丈夫氣竹西君詩才
吏幹見長於時而至推謙慎自牧歛華就實蔚然
稱完厚長者則咸歸之公公始從事藝業屢舉不
遂以蔭補司贍寺叅奉坐事罷舉能為天將接
待都監郎廳久勞陞六品除掌隸院司評出為恩
津縣監會有潢池之警易武吏見代除安陰縣監
屬疾棄歸叙為翊衛司司禦陞翊衛歷軍器寺僉
正出為林川郡守前守仍任不赴拜礪山郡守罷
歸仕宮闕都監有能聲拜繕工監僉正陞為肅川

府使言路論驟躋枳之拜慈山郡守用前任都監
勞加緋玉尋罷歸到黃州適竹西君方為通判愍
公暑行挽止待秋已遇疾卒于旅舍實萬曆甲寅
七月十七日距其生嘉靖癸丑享年六十二用是
年十二月某日歸葬坡州分水院北坤向之原公
蚤喪父母又喪繼母廬墓盡禮少鞠於季父及其
歿哀戚如親喪友愛同氣至老不衰撫卹宗族雖
賤不遺以此尤為人所稱夫人丹陽禹氏高麗侍
中玄寶之後名有婦德先公四年生後公十年歿
祔葬公墓之左舉二男二女長曰僊四山監役次

曰僊繕工監役僊娶宗室青原都正侃女生二男
三女男長之源文科戶曹叅議即請銘者秀雅恬
穆為儕類所重前娶權氏生子女俱夭取同宗子
權為後再娶尹氏生二男一女枰枰女幼次之泓
生三女皆幼女長適生負尹忠得次適叅奉姜恰
生三男一女男郃郃女幼次適元祐僊娶郡守
柳楯女生六男二女男長之瀍次之淳之濯之沃
之灌之淳之濯一男楫之沃一男三女男格之灌
二男一女之淳一男皆幼女適李濂生二男材吉
柱吉梯吉內外孫四十餘人判決名宗道利川名

宗敏竹西宗直號也銘曰

名德之家循良之風疑疑其表恂恂其中秩二千石可不謂通壽六十強可不謂長子姓振振有賢有良官于吉壤後福無疆

承文正字金君墓碣銘并序

山陰縣監金公有才子八人第五曰延祖字孝錫生而穎異見者已知其為佳胤及長儀表玉立雅步端視出入睽帶數人不煩程督自勸讀書藝業日進所為文輒出等輩上山陰公喜曰嗣家聲者必此兒也嘗從吳正言長受易未幾吳遜席曰君

非待教者也遂與為友壬寅遭外憂過毀幸全逮
山陰公時連舉發解忌蚤勿再試年二十八始登
第揀補槐院將薦入史館明年十月以疾歿去其
生萬曆乙酉二十九年士友相吊靡不有蘭摧玉
折之歎是年十二月某甲從葬醴泉郡廣石山午
向之原君孝友出於天性最得父母心兄弟相教
誨庭闈之間雍雍肅肅諸所以自佚者不用也山
陰公嘉其志尚手書聖賢格言以詒之柳西厓罷
相居鄉君學于門下西厓稱其穎敏嗜學後生中
鮮儷寒岡鄭公蒞本府聚諸生講讀每見君亦稱

之君性簡默平居對人或終日不語其處家室尤
謹嚴所以戒勗良至少時頗十急後自矯揉居太
學有傲言者座皆愠見君獨夷然若無聞及塲屋
揭榜得失之際不見貳色以此儕類益重其操常
曰學問之道無他只在孝悌山陰公病殂遑遑號
泣親舐遺矢以驗吉凶母夫人有不安節憂形於
色須臾不去側至夕如一日有孽妹母賤不收君
出貲求贖其主義而聽之篤於內行類如此病時
謂其伯曰吾兄弟不能親具甘旨費年劬書冀以
成名為吾親一日之養名今幸成而身又不幸豈

非命也聞者於邑易簣之曰神氣不亂諸弟問終身行之者曰為善又問他日何以命遺孤亦曰為善餘無一言嗟呼惜哉使君而年其所成就豈止如是而已君安東豐山縣人高麗三司左尹安鼎之後高祖楊震工曹叅判曾祖義貞弘文修撰有文章為權奸所擠未究厥施祖農掌諫院司議贈左承旨考諱大賢卒官山陰連三世不顯官而名與顯官齊五子聯中文科用 贈吏曹叅判士大夫家豔言之妣完山李氏封貞夫人婦德毋儀咸脩君娶洸馬金藻女非一金也生一男曰時任

卒時始三歲既長告於叔父中丞應祖具狀請銘
于墓可謂有子矣銘曰

天於生人孰為厚薄予之何豐奪之何亟才命相
仇自昔如何吾銘其行百世不磨

司憲府持平金君墓碣銘并序

君諱鼎一字義重新羅敬順王之後敬順王入高
麗為儀賓徙籍安東子孫遂為安東人五傳至方
慶征討有功封上洛公諡忠烈事載麗史號為名
臣上洛之子愼密直司事密直之子承用寶文閣
大提學大提學之子厚龍封上洛君室組聯綿延

為大家我太祖朝知遂安郡事七陽生填寶文
閣直提學生三老免山縣監生堦長興庫主簿是
為君之高祖曾祖諱允劉祖諱夏祥俱不仕考諱
壤折衝將軍龍驤衛護軍居鄉以孝聞娶清州慶
氏生君於嘉靖壬戌自幼嗜書每有文會曹偶推
居前列戊子中司馬己亥登文科隸成均館學諭
倒陞典籍屢遷工曹佐郎世子侍講院司書無
春秋館記注官兵曹佐郎辛丑擢拜司憲府持平
遷為正郎刑禮兩曹者各再以巡檢御史使龍灣
以敬差官往端川監採銀與鄭弘翼為代還又以

敬差官出坼甸以御史出湖西皆視災傷數年之中往返道路計六十餘里未嘗言勞勩乙巳左降公州判官州本劇部彫剝已久適移設監營于本州去牧使以判官代之其治視舊尤難人多規避時權倖用事盡逐異己君素無要路迹名為遶東而實擠之君不以遷客自居悉心營職上下相安去後吏民追思之戊申戶曹正郎成鏡道都事親瘠棄歸散秩即閑己酉六月二十四日以疾終於家得年四十八是年九月二十四日從葬坡州先塋下冑向之原君性忱厚不設城府不事交游不

銜飾以求名譽居官廢事寧拙毋巧寧緩毋驟以
故少赫赫聲然與人交一之不易當世道嬗變出
入榮瘁之際終始無貳色此其所以立也父母俱
老壽家貧以色為養朝夕依依膝下不為去須臾
俸祿之外不別治生家人告匱笑曰有自然之道
爾不見其憂歎疾病謂其子曰二尊人在堂而不
得於養吾死不瞑目聞者悲之配金氏系出康津
牧使福億之女名有婦德事舅姑盡禮教飭諸子
義方蘄然君亡哭泣成疾服闋猶喪食後四年壬
子殯合葬君墓生二男五女男長垌文科掌令恬

靜好山水求爲清風郡守次堪中司馬授察訪女
長適李克匡次洪時建尹鉞趙必久金地西清風
三男三女曰寅亮通津縣監曰翼亮曰允亮女婿
洪碩亨尹壽益李重熙察訪二男三女曰聲亮曰
鳴亮女婿洪時顯宋仁卿季未行李克匡二男七
女曰奎老持平曰斗老洪時建五女尹鉞無后趙
必久一男一女男相周金地西二男三女曰世桂
曰漢桂女皆嫁簪纓家寅亮三男二女長婿翼亮
二男聲亮三男一女餘幼婿一男内外曾孫男女
若干往年清風以書乞銘許而未就忽焉棄世其

孤寅亮能繼父志請之愈懇余不忍已諾於逝者
老病昏眊收涕而為銘詞曰

闕智櫝之味鄒國之麗之純一王傳伏之上洛接
之寶文牒之種必穫之始宜復之培之過之君子
惜之筆之石之來者式之

司憲府掌令宋君墓碣銘

并序

君諱希進字退之姓宋氏恩津人高麗判事大原
之後至司憲執端明誼有名于時鄭圃隱其友也
聘叅判懷德黃粹之門遂移家焉今之宋村是也
入本朝有雙清堂者隱德不仕朴彭年仁叟叙

其美鄉人高仰稱之不以名而以號也曾祖諱汝霖楊根郡守祖諱世勛安岳郡守 贈戶曹叅議考諱柟壽林川郡守壽爵進嘉義大夫副護軍妣晉州柳氏生君於萬曆庚辰正月二十二日少善病父母念之不苛督而自勵於學能爲博士家言二十四中司馬居太學持論侃侃爲士友所重庚戌母憂服除見時事昏亂不欲赴公車以親老黽勉就之其志可觀也今 上初除 奉先殿叅奉丙寅護軍公捐館制畢連除 顯穆二陵叅奉戊辰登文科別試選補承文院權知正字屢拜承政

院注書皆未久病辭以記事官與校

屢朝實錄

考滿例遷典籍改禮曹佐郎由禮曹入憲府爲持平者四掌令者再入成均爲直講者三司藝者一入諫院爲正言獻納者各一入春坊爲文學者三爲通禮院相禮者一 中旨左調清河縣監崇禎十四年二月十日以疾卒於家壽六十二是年四月二十五日葬公州沙寒里巽向之原護軍公墓後君爲人溫雅耿介內行純脩護軍公大耄康強優游田里者十餘年君近五十宛然孺子慕日與昆弟子姪周旋左右修辭色而奉之擇味而進之

護軍公甚愛每事與議蓋人人稱其孝矣其在講
筵悉心啓聖所陳說多勸戒之言世子深納之
在臺也力救儒臣之論廷崇獲罪者以此坐免不
卹時建置各鎮營將爲緩急備大司馬愾舉年七
十者苟充衆口譁然君舉劾之司馬恃恩傲狠
怒顯己失反上疏齟之 上入其言疑白簡有所
徇至欲廷尉問近臣諫官皆以言路爲請得毋逮
上疑猶未解銓曹擬君前任以白其誣於是清河
之 命下矣君促裝赴官不見怨尤之意縣本薄
小重困苛政凋瘵已甚下車先問疾苦委曲撫循

若祗席而乳哺之一境大悅丙子寇深行在受
圍隨方伯在界上及兵解始聞朝廷消息還邑
設望闕位慷慨痛哭憤不自勝中夜獨處泣涕
霑衣亡何棄官歸家方伯以治行聞吏民請留不
得相與刻石頌美舊居在雙清堂側日夕與宗族
故人徜徉其下以寓追慕之懷鄉有三賢書院君
爲山長月月會講小學爲書以警媮習後進子弟
多興起者嗚呼君懷志晚遇思欲有所自見而橫
遭斥犇竟未再進士論惜之然居家著馴行立朝
秉直操涖邑稱良宰此亦可以見君哉配東萊鄭

氏然奉嫺之女然議復始之孫賢有婦德先君一
年歿至君之葬與之同塋生二男三女男曰國士
曰國憲女壻生負李陽煥陸止寬韓志遠國士娶
沈倬女生三男國憲初娶府使池汝海女生一男
二女再娶閔光煥女未育李與韓无后陸三男三
女皆幼内外孫男女十二人銘曰

維執端忠之侶暨雙清仁叟與君遺紹秉志潔憫
國玷義愈烈沙寒之曲四尺碣孝子徵銘不愧筆

慶州府尹朴公墓碣銘

并序

鷄林尹朴公之為御史也余為大夫將會見於臺

中蹉跌未諧後十年聞公歿世又三年其孫重輝等以襄陽守李尚逸之狀來乞銘噫余雖不面固心嚮之矣安可以存亡異視也謹按公諱守弘字裕彥曾拔新羅籍于密陽後居善山高麗時有尚書僕射彥仁其後代有衣冠曾祖應宗延安都護府使 贈通禮院左通禮祖希閔 贈承政院左承旨考鼎實 贈吏曹叅判兩世不遂歸成胤嗣妣星山李氏縣令敏善之女萬曆戊子後六月三日生公巖然蚤成六歲喪父能自哀戚不以稚廢禮隨母依外氏比安縣舍 天朝征倭兵到縣適

值宰君不在縱暴侵擾人皆恐懼箴匿公時少外
黃兒三歲獨不懾往告其將見公幼敏大異之稱
曰他日貴人也立下令禁止旣而外氏去官公還
善山舊居始承旨公弟直長希曾無嗣與其相廬
氏子蓄叅判公公亦自幼鞠於其家至是大母廬
安人尚在與母星山夫人同居止公奉二尊人兵
荒之餘身任家事上承下撫母之經紀卽以餘力
治公車業其志不顯揚不休也丁巳舉鄉解赴洛
奸黨附廢 母論劫諸生上疏助之公與同志數
人堅不叅削跡不顧戊午登文科乙科選補承文

院權知副正字遷正字為親求為省峴察訪癸亥
內憂廬墓盡禮服除例陞典籍改禮曹佐郎明年
陞正郎兼史館記注丁卯虜警扈駕入江都及
和議成不樂在朝出為金溝縣令至則政亂民散
幾不為邑公悉心治理弊去民還卒以告完間詣
學宮憫其頽圯移于吉壤煥然一新擇鄉子弟俊
秀者教導有方彬彬可觀四年子喪棄歸民追思
碑之明年復入禮曹以能治劇擢拜平壤府庶尹
府當西門孔道羽檄輪鞅旁午應接不暇猾吏訟
師舞文弄法互為欺蔽最稱難理公精心剖斷積

案若洗事無愆滯人情翕然為奉使不悅者所中
逮至金吾事白即釋初吏民間公見逮擁路號泣
憂囹圄費資送甚厚既理出盡還之一無所留或
曰其饋也有辭何必却之公曰辭受有義事與初
異不可不如是也未久復入禮曹尋陞通禮院相
禮拜司憲府持平自是常居顯要暫試松都經歷
不十日徵還仍陞掌令屢辭屢拜不離臺席持法
論事頗有古御史風於講院文學弼善於師儒直
講司成於寺正宗簿太僕於諫院正言會有北顧
憂用薦者授穩城府使進階通政公不以内外夷

險易志疆力自勵振刷戎政蠲除宿逋乳哺單赤
軍民既皆悅喜迺謁孔子廟躬行釋菜一洗陋習
殿宇之傾側不修者俎豆禮器之非古制者並皆
新之遂為一時邊郡冠戍寅瓜代刻石頌義如金
溝焉入騎曹再為叅知由同副至左承旨夙宵不
懈未嘗請告自佚下教褒予明年由刑曹叅議
拜慶州府尹秩視二品推恩三代鄉邦榮之屬
歲荐饑民不勝殍盡發公私畜悉力賑救所全活
甚多滿三載歸鄉結茅洛東江上為終老計亡何
示儻判決事左承旨之命皆不就就醫治病竟

卒于尚州之旅舍實崇禎甲申三月十日也得年
五十七是年五月十三日從葬善山金烏山址多
福洞向午之原夫人鄭氏同原異墳夫人系出迎
日父維城高麗名臣襲明之後郡守德水李瑞其
外祖也郡守即栗谷先生之弟名有家法夫人能
修壺範宗族咸稱之生一男二女男曰震煥女適
鄭元謨趙相杓庶出男一震曜女二幼震煥娶教
官金翺女生六男二女長重輝進士次增輝餘幼
鄭元謨一男二女趙相杓一男重輝娶縣令曹挺
融女生一男一女增輝娶郡守金壽昌女生一男

內外孫男女若干人公為人豐姿偉幹冠宇寬洪
長於政術所至有惠愛自以未逮嚴訓奉母日短
茵鼎之享痛若荼毒竟其生母替仕宦不汲汲名
譽撫邑望郡不改布素節此可以見染也余不能
名公而得於狀者如此痛述其略愧無以盡之也
銘曰

金烏之陰有鬱佳城有隆斯石有顯斯銘官則二
品績則才臣是謂不朽輝映無垠

宣務郎宋君藻頌銘并序

宋氏望恩津高麗判事大原之後至曾孫司憲執

端明誼以清裁直操有名于時至孫愉隱德不仕
號雙清堂益有名世稱宋氏之門多賢士傳子繼
祀尚州判官 贈司憲府持平傳子遙年軍資監
正兼校書館判校負材望不大施以卒事載大提
學虛白成公所撰墓碑第二子曰諱汝揖生而岐
嶷長益英特為父母所鍾愛將任於朝受階宣務
郎亡何遽歿年二十八人無不惜之者配完山李
氏我 恭定大王子敬寧君祔之曾孫與宣務君
俱葬公州沙寒里卯向之原而二其墳有二子曰
世英承仕郎曰世雄軍資監判官子姓蕃昌今至

數百餘人日玄孫浚吉以書屬余曰先祖不幸蚤
世生不能顯於時死又不能傳之後則是終於泯
沒而止耳此仁人君子之所愍惻况為子孫者哉
願得一言之重以為不朽地余聞無德不報者天
道也不于其身于其子孫觀其子孫之盛衰而知
其德之如何也世有魏爵崇位高年大耋享用一
時之福而宗祀之饗塚域無守永為泉壤之孤傷
者多矣若宣務君天鍾未發之蓄將錫衍於無疆
而名與之久豈其爵豈其位乎余非不朽人者謹
書其所聞以慰子孫之心銘曰

於虞宣務何世之能家何德之孔嘉何壽之不多
維堵有碣孝孫之思我篆銘章昭眎无期

李秀才墓碣銘并序

李君光立字汝晦 太宗大王子謹寧君謚僖懿
公諱禮之六代孫謹寧生玉山君謚恭簡公諱躋
是生明善大夫寧仁副正諱楮 世祖朝選授宣
傳官 睿宗朝奉使嶺南按撫盜賊屢被 恩數
是生丹城守諱誼試藝居魁陞明善大夫是生副
司直諱承說性伉直不肯隨人後選舉以此竟其
身是生監察諱克誠是生副司果諱廷謙居監察

公憂苦塊中執禮踰制以疾不起妣平山申氏漢
城府庶尹諱孝仲女 贈吏曹判書金公諱魯之
外孫君生於萬曆壬午八月二十日不踰閭而孤
見者哀之申夫人長於法門撫愛之雖甚然教導
不出義方稍長仲父禦侮將軍諱廷諧無子子之
禦侮公娶陽川許氏瓦署別提汴之女 贈左贊
成礎之孫萬曆甲寅丁申夫人憂與兄榮立廬墓
盡禮戊辰又丁許夫人憂前後喪各盡哀敬鄉黨
稱之君於家以順稱於僮僕以惠稱離經辨志師
友以敏稱作詩著賦儕輩以才稱屢薦公車將以

成其名不幸年五十五一疾不起溘然長逝哀哉
配尚州朴氏 贈執義致安之女即己卯名臣承
旨世燾之兄世煦之曾孫 贈吏曹參判尹吉之
外孫聰明溫順得婦道甚某年某月卒去其生甲
申實五十五年俱葬于揚州陶穴里梅花洞午向
之原禦侮公墓傍同原異墳生子四人女四人男
文祥次文裕俱中司馬次文祐次文祲女長未笄
次宣教郎黃榮次士人任郊次士人李煥文祥
娶佐郎李玟女文裕娶正郎任資之之女生二男
文祐娶李公弼之女生一女文祲娶生員鄭綰之

女生一文黃茶一男曰應老任鄰三男一文李煥
二男皆幼嗚呼君早自頽脫宜及身以顯而閤而
未遂勗力數灌冀以達其技而又不及其榮茂識
者知天道之必有報也彬彬競美者其在茲歟其
在茲歟銘曰

有谷之遠遠有山之嶙嶙伊誰之宅肇我王孫良
田義種華實纂纂一丘雙珏留映二春

承政院左副承旨申公墓碣銘

并序

成文簡公以傳家正學教授于牛溪之上成就弟
子未易數至若庶幾如夫子所稱門人加親者惟

高靈申公最先進公諱應渠字子方左議政文景
公用漑之後文景之父漑為咸吉道觀察使死鄧
李施愛之亂至孫汝柱加平郡守家廟失火冒入
鬱攸不出朝廷旌其門觀察以下皆以忠孝傳
家考諱撥以循良顯壽爵二品世一口稱厚德長
者娶海平尹義衡女嘉靖癸丑生公天性方嚴自
少端緒已見雖同輩不敢以狎進十八學于先生
之門先生一見問其志大加稱賞期以遠大又從
栗谷先生問業一時勝流皆折行輩與交以道義
相切磋由是益有名庚辰銓部舉授內贍叅奉不

就壬午中司馬自此謝絕公車不復應試褫躬執
行從容養重不銜飾以暴人耳目再爲王子師
傳皆不久仕朝廷擢用名行之士超叙六品授
掌苑出拜稷山縣監有所不樂數月病辭四年除
任實縣監庚寅棄歸三年拜咸悅縣監又未久棄
歸丁酉遭母喪服除拜刑曹正郎移漢城庶尹出
爲利川府使壬寅先生爲醜正者所誣被罪遂棄
官歸杜門屏居者六年久之拜忠州牧使以親老
陳疏乞適命換廣州明年秋拜朔寧郡守庚戌
中朝有頒詔慶普推百官恩公以師傳舊勞特授

通政上救弊十條其言皆鑿鑿可行拜工曹叅議
以何又出爲楊州牧使陞嘉善封靈川君初崔有
源等告王子臨海君謀逆事甚暗昧欲引公論
所重者以爲後日自安計藉公爲說遂錄勲藉公
耻之屢疏請削己名不許乃遺子書曰吾死後若
勲名猶在以賁寃安卽請命有司痛辭官庀以明
吾意否者使余重獲罪於泉壤也癸丑州有殺人
者借勢權倖反毆官吏禁不得捕賊公奮移公牒
國家所待以立者紀綱也今權倖先自壞之國不
亡何歟所謂權倖卽賊臣爾瞻廣蓄鷹犬噬害公

廷尉問光海素重公止棄職見釋叙爲高陽郡守
丙辰丁同知公憂服除例授勲封爾瞻首發廢
母論廷議靡然公歎曰綱常絕矣天地閉矣向所
以遲徊未去者只以老親故卽上章辭職歸忠清
道藍浦地屢召不就癸亥反正悉罷僞勲公始
改正勲封除授刑曹叅議俄入銀臺爲同副承旨
序陞左副在職啓翌弘多同列皆歎服病辭移授
掌隸院判度事出拜春川府使言路以公不畏強
禦聽斷平明請仍之 上以爲彼此皆王民毋改
不得已遂行在官遘疾至十月二十二日卒壽七

十有一後 上延思不已臨窆每以未及大用爲恨以其年十二月十一日葬于楊州金村里先塋下申向之原與淑夫人海州吳氏合葬焉公凡三娶初娶江原監司 贈領議政金悌甲之女無子再娶振威縣令權大勲女生二女長女壻金就白無子早歿次適刑曹判書李時發生二男一女男慶徽司憲府持平次慶億扶安縣監女適縣監徐貞履吳夫人 贈領議政繕工監役希文之女生一男一女男澆永川郡守能嗣家聲女適某官李基祚側室一男曰澆澆娶某官李垌女生三男五

女女長適別坐金光斌次某次某次某次幼公少
負重名自待不淺蓋公之才識果敏高論橫溢必
不肯舍己從人公亦自思大有顯見以行於世忌
者與知者錯不能展素蘊有識莫不痛惜余與公
幼壯同間夙慕風義三世周旋百有餘年不惟喜
公之知我我亦自以為知公寢門之哭尚有餘晷
金石之託每記成言深恐有負於逝者今也永川
君復申前請大耋之年願泐文字之時屢辭不獲
略爲之叙而仍系之銘曰

望公之表大冬嚴雪凜乎若松栢挺立卽公之中

理到義合怡然若水霰消釋弱冠捫衣向陽之里
曰師曰弟子何異七十子之服孔子伊世遭艱少
試常述若將待於皓天終有感於蒼生嗚呼哀哉
是以為銘

清陰先生集卷之三十二

清陰先生集卷之三十三

墓誌銘

九

進士金君墓誌銘并序

天啓三年癸亥二月己丑成均進士金君卒于禮
安縣西村之居第春秋五十七既殯有日其堂弟
繼賢書赴于總兄弟尚憲畿內守制之練聖室復
以其孤鳴遠之意告葬期而求壙銘乃位而哭之
如禮復書且慰其孤而辭銘焉後五月繼賢重以
書來曰以山之有思也葬踰期延卜于遠日敢申
前請嗚呼銘將以傳後言之傳以愛其文必欲文

之非今日所宜為也顧其情終不忍不言遂收涕而為之實言君諱繼宗字孝叔安東人安東之金由我皇祖太師公始後世言華胄者必稱首焉子孫蕃衍散居仕者于京處者于鄉君考諱顯祖諱生溟曾祖諱珣三世居鄉不仕與尚憲同出于高祖掌令府君府君諱永鉢自府君以下至尚憲四世仕宦于京以此吾冠後十年始與君相見其貌癯而古也其言疏而達也曾次坦夷而無畦畛也衣冠朴野而不修飾也多稱人之美而略于過時有同宗兄九潭金允士悅亦居于安東寬厚豁達

有長者風月朝無異評吾嘗意二兄人物行第俱
伯叔也歲戊午某避地安東君數來訪留連敘述
忘日夜於是益聞所未聞君在腹父棄世既生善
病不自立八歲忽問父所在家人佯對以觀之涕
泣求問不已遂指其墓處君請具往莫伏哭墓側
終日不去適大雪獨與一童負躬掃除塋域自後
每徃省視哀慕如一父黨柳西厓成龍聞而亟稱
之曰金某有子矣君少失學及長自厲讀書遭世
亂輟業竟不如其志年四十始名進士八上庠已
退歸鄉里教訓諸子不復就公車家素貧至君愈

削鄉先生有欲列君行誼薦于朝官之未果臨終遺命儉葬戒諸子曰處身至難爾等勉之求做好人勿作庸鄙事鄉里吊者相告語曰善人亡矣以是年某月某日葬于縣北伸義谷乙向之原君娶某郡某氏生三男一女男長鳴遠生負進學不已次震遠出後九潭君嘗學於余頗有才李聲遠女適生負琴尚絃生二男時出時發嗚呼君視九潭君又何祉哉銘曰

族之華兮家則寒身之卑兮行則尊壽又不多天何慳蓄祉不享歸羸後昆而箴之儉而俾體安千

秋萬福方其永無艱

坡平尹公配慶夫人合葬墓誌銘并序

公諱昌世字興伯姓尹氏坡平人高麗太祖三韓
功臣辛達之後肅宗時有文武大臣曰瓘平戎拓
地建不世之功封鈴平縣開國伯謚文肅子曰彥
頤政堂文學由政堂以下趾義襲慶世有其人有
諱坤事我太宗錄佐命功封坡平君七世祖也
曾祖諱倬明經好學為大司成十餘年成就弟子
甚多薦紳大夫至今稱道之不衰祖諱先知忠清
道兵馬節度使恂恂有儒者風考諱瓘以世功補

忠義衛階振威將軍配曰淑人文化柳氏通政大夫淵之女府院君亮之玄孫以嘉靖癸卯生公年十八娶同知中樞府事慶渾女生五丈夫子女子子二人蚤習舉子業屢舉不遂年五十遭壬辰之亂以布衣奮義糾集鄉兵討賊于湖嶺之隘明年春以疾卒于軍實萬曆癸巳三月也其年十月卜葬于尼山縣先屯辛向之原公歿之後長男燧次男煌次男烱繼擢文科遂歷諸曹郎終竹州府使煌由侍從臺諫薦為議政府舍人有令名方以遠大期烱司憲府持平次男燧中司馬為晉佐郎

桂未仕長女婿朴謀次女婿宋熙祚金吾郎於是
君子謂福善之道果不替也尚憲少時竊聞長老
言公內行純備孝於親信於朋友惠於宗族鄉黨
修之身而不求知於人及讀其家狀如所聞焉最
狀公資稟粹美內和順而翼翼其容有深憂於父
母父母居尼山命學于京城不忍久違一歲中牽
半留半歸侍年二十九遭母喪母病不時求西瓜
不得終身不忍食西瓜後值父病醫言龜肉可愈
疾方冬出野至誠祈覓忽遇羣龜聚首負水取以
進之病亟又斷手指進血得少甦人以為孝感所

致疾竟不起哀感踰禮三年廬于墓下祭具非躬
泣而手執者不薦塋域之內一土一木無不自致
力焉盡捐家財列石飾墓道極盡其制無纖毫遺
憾然後已待庶母終不失其意使易鑿為誅人尤
以為難至於父母所愛畜生皆視之有恩母舅蚤
世無子舅妻倚公為託生養之如母死祭之如生
焉好法文公家禮每晨起謁祠堂祭祀致敬不過
時時節必歸拜墳墓寒暑不輟治家有法豐而不
侈節而不嗇待賓客親疏各當其道無衣食者資
給之有喪者以財救之喪馬服用與人共獎有知

識因亂奉母來歸者館之其母死又棺斂殯而畢
葬焉其人曰校鄉里列其行薦于有司而未及用
其遇難也慷慨為一縣倡約同志分遣告諭旁邑
爭赴集以誓滅此賊母負吾王八字揭之于旗時
號八字軍從之者愈衆衆推公為首公不居讓於
習兵事者主其軍而公實籌策之暨勦賊有鹵獲
具聞行在公絕不自宣由是朝廷莫有知其
功也無何主軍者遭癘疫公親自救藥或勸宜少
避公曰既誓同死生見其危而棄去吾不忍也其
人愈而公病始病遇忌日設位哭如喪病遂篤以

卒嗚呼公之德宜顯於世宜施於政宜澤於民而
卒不能揚庭策名展其所蘊而齎志沒地以遺其
後福以興其嗣胤以光紹其先烈豈天意歟豈天
意歟慶夫人系出清州高麗侍中復興之後生于
嘉靖乙巳至天啓甲子七月卒于京城南舍人第
是年九月歸祔于尼山公墓之右自幼聰明婉孌
於婦道無所不宜以順以慈婦母母人謂諸子
樹立夫人教飭之力為多兩美合德宜其有後也
府使娶牧使李玄培女無子以弟之子為子舍人
娶牛溪先生成渾女生五男一女男曰勛舉別提

曰舜舉即後府使者也曰商舉曰文舉曰宣舉女
適李正興側室生三男一女並幼持平娶庶尹海
平尹皖女生三男一女男曰元舉曰仲舉曰叔舉
女適宋時瑩佐郎娶僉知南原尹祁女生五男四
女男曰雲舉曰鴻舉曰溟舉女適南原尹衡覺餘
幼姪娶水使洪昌世女未育曾孫男女共若干人
銘曰

用之行之誰使之張歛之蓄之誰使之藏何閔於
身而後之彰昭哉天道孰云茫茫爾類永錫彌久
彌長佳城鬱鬱卜云其臧叔度為銘長夜之光

峒隱先生李公墓誌銘并序

峒隱先生之葬無壙銘後九年其兄孫丹陽郡守厚源以狀抵尚憲請為銘嗚呼古人銘林宗不愧先生今之林宗矧吾先友銘其敢辭謹按先生諱義健字宜仲峒隱其號也五代祖璵始封廣平大君我世宗第五子廣平生永順君溥賢而才有河間東平之美永順生清安君嶸清安生定安副正千壽九歲以善喪聞定安生白川郡守漢娶鷄林君崔漢洪女生二子先生其季也天資恬澹冲雅儀表玉立力學自修不事科業不慕仕宦年三

十二始以太夫人命赴試中甲子進士諸公多薦
者累下除命不就晚為敦寧府直長黽勉暫出親
沒不復仕事母孝母病思銀魚不得終身不食銀
魚內外皆琮璜鍾鼎之世貲貨頗足以先生之好
施也孫孀貧窮日有來叩者隨即傾副不問有亡
家用缺必市買不求諸人或有所覬者非其人與義
不納喜客不喜辭費但示惻惻而已一時之人無
賢愚清濁老少樂與之游退而若有所得對衆舉
善必曰李君李君人無異辭然人有違行謗責之
不改則已之第中別構小齋植梅竹列圖書焚香

靜坐鳴琴詠詩與先生接者自不萌鄙俗之心少
時與朋友各言所志先生言結屋深山中樹樊笆
澗雪後萬徑俱絕閉門高卧此至樂也聞者暑月
若懷冰焉好游名山水探歷不倦遇會心處輒留
戀吟嘯樂而忘返小築在白雲山往來僦伴以寄
蕭散之懷足不蹈利勢之塗雖平生故人方居要
路亦不往詩學唐書學二王清婉端勁如其人品
思菴朴相淳順菴宋公寅雅愛重之李文成公珥
牛溪成先生渾松江鄭相澈月汀尹公根壽守菴
朴技華古玉鄭磻皆與之友善牛溪松江尤為莫

逆交咸謂黃憲徐穉再出後來如白沙李相恒福
象村申相欽月沙李相廷龜無不疊疊傾嚮至庚
戌歲白沙相請擢用以礪衰俗超授工曹沅郎又
陞正郎竟不拜先生生於嘉靖癸巳卒於天啓辛
酉壽八十有九其年十二月葬廣州治西光秀山
午向之原自廣平至白川俱葬是先生娶敦寧府
都正坡平尹珍女無子勸之立後曰兄有一子承
先人祀舍此則求功總之屬也豈若託兄子而祔
食於吾祖吾父之爲安也孝友之性蓋如此云嗚
呼先生之風爲人所景慕者至今愈盛有以也夫

清隱先生集卷之三
銘曰

光秀之原有埋幽石云誰之藏其人如玉

知敦寧府事趙公墓誌銘

并序

公姓趙氏諱存性字守初自號鼎谷亦曰龍湖遠祖岑高麗判中樞院事始籍于楊州之漢陽縣遂為顯望入我朝有諱末生以壯元連中重試歷事太宗世宗寵遇郅隆國有大事必咨決焉官至領中樞院事集賢殿大提學卒謚文剛四傳至諱邦佐敦寧府叅奉贈兵曹判書於公為曾祖也諱俊秀龍仁縣令祖也諱曄贈吏曹判書考也

吏判公出後同宗以贈吏曹叅判連孫為考以漢
川尉無疆為祖叅判以下之贈由公貴也文剛之
後世襲冠冕而公之從祖彥秀士秀並名鄉顯重
漢川公禁嚮尊貴門戶煒赫時稱其鍾義吏判公
聰敏好學風度夙茂李處士夢奎有賢女擇配一
見心嚮以女歸之嘉靖甲寅正月癸亥生公廣額
大耳啼甚雄判書喜曰吾病恐無以嗣先業今兒
異家必不替也九月而判書公不幸李夫人教養
無至纔有知語及子母孤乳輒怛然悲泣與羣兒
處游戲不凡見者知其遠到甫齒始授書十二赴

黌舍偕諸生講書主試者見公尚幼欲觀其所應
故斬之曰乳臭兒亦能講耶公從容即席舉止無
忤開卷朗讀講義明白座皆驚異歎賞稍長崇日
進所與交無非賢豪間入李相國恒福辛祭判慶
晉尤見重焉癸酉中司馬明年就學于坡山成牛
溪先生先生器遇之嘗游守庵朴枝華所并號鑒
識存許可獨稱趙某胸中自有經世大志公益自
奮勵讀書過庠杜門治病十年許每太學諸生有
論議就公詢訪庚寅擢文科即薦授藝文館檢閱
辛卯陞待教自己丑逆變之後脩甌者以治獄大

臣為罪從暗中媒孽首擠鄭左相澈竄西裔因指
為黨人盡逐一時士流公亦坐罷壬辰為長子娶
婦往閩西聞倭寇猝至徑路馳歸乘輿已西幸
矣公素無兄弟大夫人獨在家倉猝出避不知其
處徧尋東道山谷中相遇時賊已入京城西路阻
梗遂轉向湖右託大夫人於舅氏癸巳二月浮海
達行在上疏陳情宣廟召見慰諭陞奉教
命往湖南抽視名山史箴未還例遷永均館典籍
轉禮曹佐郎拜司諫院正言大駕移駐永柔公
復命入對南方郡邑月月有所進轉輸之艱倍

於轉餉當今八路塗炭 國命如綫政宜除不急
之貢罷無名之獻專意撫摩瘡痍討賊興復仍陳
軍計便宜上嘉納即命有司量減貢獻顧司馬長
曰此言可底用與大臣議行之公又言臣入海西
界後官奴擊傷人至死吏不敢問道路傳言籍籍
此豈殿下所知者然未必非教飭無素也因論官
闡不嚴十數事言甚剴切左右聞者縮頸尋適正
言授典籍秋充冬至使書狀官無司憲府監察如
京師明年春還陛拜直講先是 中朝嚴禁硝黃
屢請不許兵部尚書石星主東事有撤兵議事機

甚重遴遣使价凡三易擬而公卒膺命至則會
使臣病瓠公見石尚書指陳賊可破狀旋師非計
且言小邦守國保境寔修藩職皇朝何惜禦敵
之用以示不廣尚書改容稱是心偉之問庚多少
語舌官曰藩國有人何憂賊不破即奏留師頒硝
黃八萬餘斤降勅褒諭上嘉之故有是命夏
以本官為郎撫軍司隨分朝于全慶地方體察使
尹相國斗壽引為從事冬拜戶曹正郎往牙山監
督湖西田稅自亂後漕司不得人運道不繼度支
數告匱會有薦者授公三道海運判官及視篆設

便宜法未數月漕稅滿已前三年逋額益著能名
瓜滿再予一期丁酉秋坐事罷未久用大臣薦起
家拜通禮院贊儀督運御史赴西關時西民困蜚
輓天朝運餉到我境多滯天將怒乏軍興公日
夜驅馳前後運解四十餘萬斛卒以濟事戊戌授
奉常寺僉正以病不拜自癸巳後不樂在朝退居
田舍優游自佚辛丑復拜直講一時士論謂公前
以直屈宜置邇列風敢言上而才公者又欲畀大
州府以盡其能累薦皆不獲秋陞內資寺正出為
江華府使撫民節用公私俱足權貴有求於公而

不售者嗾諫官論罷公去而名績愈彰公議華然
以為誣罔論者愧悔謝服癸卯由成均館司藝進
司成甲辰正月以御史出湖南括民隱田正田下
賦上者還除揚州牧使有墓也賊獲接法不赴俄
改忠州州居四衝列兵甚民未復業公至首陳逋
負徵責之害 宣廟命蠲之民多賴焉乙巳正月
遭內艱丁未服闋拜瑞山郡守戊申先海即位明
年春瀕海患島寇易以武弁公見代在郡三年節
縮浮費盡實其廩之空厓者儲剝至數千石或勸
公宜報上司知之公笑曰吾豈徵賞者也只填官

尊是矣九月拜掌樂院正無春秋編修官光海初
政振按淹滯銓部以公久困積薪每臺省注擬置
諸高選而御批下率越公用他人議者竊恠之至
二年庚戌乃除正言公前去是職已十有八年人
有為言者公曰吾所懼不稱職崇屏安敢計乎公
先在江華客有習於公者自以東宮掖庭意求施
僧川叔公正言責之客慚而退至是人頗知其故公
終不自宣光海議追尊生母公據禮力諍重忤視
職前後居諫垣皆以言去人多之秋授東萊府使
進階通政大臣薦之也萊有倭館接應歸輸之地

嶺以南州縣管轄聽財一失之苛緩其害不貲公
至一切斤斤守法削濫責之數防塞暗洩明其出
入費省而用給觀察使善而從其言一道稱惠倭
性毒巧細善覘人公待之有體頗得其心服一日
設享小酋慕公欲有所獻至能酒竟不敢言見嚴
如此云辛亥病遶西叙護軍李領相德馨知公饒
幹局屢推轂卒未見用壬子夏錄全慶羈勒勞進
階嘉善秋充冬至使朝京賀節癸丑還未幾朴應
犀誣告獄起奸臣嗾誣公卿名士數十人公亦被
逮已而釋黜屏居龍湖亭舍閱圖籍玩琴棋夷然

若無事者及廢母論發不欲在近郊乃歸湖西舊
庄辛酉赦西叙護軍壬戌有司建罷海運判官遣
特使難其人有以公已事薦者遂充海運使借之
重權許自辟其屬公辭不獲往兩湖船穀數萬石
未解聞 國家反正請解使職入覲今 上下教
曰此時軍餉最重卿其勿辭敬哉四月拜刑曹叅
判公䟽舉民瘼語中時病 上稱善轉戶曹叅判
召還兼同知義禁府事適有上變者獄訖進嘉義
冬除松都留守不拜改同知敦寧府事兼五衛都
摠府副摠管甲子正月復有松都之命未赴逆适

叛兵且逼 上南幸改授戶曹參判李曙兵敗走
或言其死即拜公京畿觀察使代曙曙出仍命
公為檢察使扈從公州追誅 上還都賞從臣進
資憲大夫知中樞府事入耆老社故典壽爵俱尊
者得與是會於是人益推公為大福秋出為江原
道觀察使本職如故臺臣有惜其去者啓留之議
不行公曰吾老矣常恨報國無階今幸受命專一
面職是巡宣其敢自安逸乎親歷險阻問民疾苦
多所蠲除墨吏恃輿援自恣者貴戚居間不聽竟
置下考列郡聞風內戢亡何勞病不任職章三上

得遶還朝徵事坐罷冬西叙護軍尋知敦寧丁卯
正月西虜大舉兵驟入旬日間至平山上奉宗
社移駐江都命公分長度支隨世子往全州
公已瘁見者皆以為憂而一未嘗辭病殫精調度
士無告飢二月賊退復隨世子入江都上回
鑾公留衛三宮五月還京疾轉劇在牀第者幾
一年子弟請請醫視方益治良劑公却之曰人生七
十五強進瞑眩復冀時月之延非達人也至明年
六月二十七日丙辰卒計聞上輟朝吊祭賻如
儀公資稟厚重器量峻偉中身美髯望之儼然即

之坦然智慮周物揣事懸合言語忠實絕矯偽之
習居家簡嚴晨起靜處一室無疾言無惰容左右
不呵而慴內外肅然如朝廷自痛蚤孤事大夫人
盡致養之道不毀之年遭喪中禮人以為難一姊
既歸而亡待其婿如姊生甥畜其後婦子祭姊者
分與臧獲親戚之貧無依者資給而教育之常曰
朋友有故可絕宗族有過則胥誨之俾不至惡此
恩義之分也訓子孫修飭內行不尚文華見人非
義直規之無隱於所好欣然亶亶傾倒至終身不
貳自守甚確任言責抗直不顧其治郡不以毀譽

為動制豪強伏奸猾興滯補弊一意奉公公家之物雖小不輕以與人再使燕視橐裝其還如往時居業日有獻日本研者亦不受然未嘗自喜為皎皎白以此稱其長者夫人李氏龍仁世族江原都事蓋忠之女生與公同年月七歲而業女紅十歲而人事備十七而歸于公壺闈自整父母兄弟親戚姻婭俱驩然而蘇壬辰公適西未歸夫人侍姑避賊詣廟泣告故奉主橐而負侍者曰豈若埋之夫人曰死則死主不可舍去又曰盍與人任曰惡可託人而自寧乎逮公奔問行在遇姑病篤

晝夜侍疾不少懈病已乃復常其德行懿義具載
玄軒申相國狀中夫人初難子後舉五丈夫女子
三人婚嫁者四餘並夭男長宗遠娶庶尹金庠秀
女生一女先公歿次昌遠縣監娶大司諫崔鐵堅
女生一男三女次啓遠文科佐郎娶領議政文貞
公申欽女女適監察朴徹生一女亦先歿縣監之
男曰胤錫佐郎之男曰晉錫龜錫禧錫內外諸孫
共若干人丁未十月一日以疾卒葬揚州治東金
村里舅判書公墓前乙坐之原公之即遠也用術
人言權窆于次岡至今年正月丙寅穿夫人塚右

而同塋焉尚憲後公二十六年生公之中兩科與
仲父暨伯兄先後同年又與先君子厚契乃折行
輩亦呼尚憲為少友往來通家三紀于茲公之政
事言行親見而聞者蓋多而不敢自質謹綴其家
乘所載載石而納之窀嗚呼其能不朽公耶銘曰
業先羸只位身榮只壽考康只子孫昌只吁嗟光
只金村之岡厥土燥剛是為公之藏萬禩無殃

贈貞夫人完山李氏墓誌銘并序

故山陰縣監金大賢妻令人完山李氏墓在醴泉
郡廣石山其向之原舅掌隸院司議墓後與山陰

公墓對岡其卒在天啓丙寅二月某日葬在是年
四月某日明年丁卯長男奉祖使弟榮祖具狀請
於山陰公中表弟安東金尚憲爲之誌按夫人我
太宗恭定大王八代孫龍岡縣令 贈吏曹判書
某曾祖也全州府尹楫祖也忠義衛修義副尉續
金考也修義公娶於鄭氏鄭氏之母曰申夫人吏
曹判書公齊之女也以嘉靖乙卯生夫人八歲鄭
氏歿申夫人鞠於家愛其端莊警敏爲擇佳壻嫁
時年十五於婦道無不宜司議公素元厲少許可
於夫人每稱佳婦尚憲少學於山陰公得出入閨

閭如親昆弟見夫人日晨興命灑掃室堂庭廡自
枕簟器用悉整齊方列使婢僕不聞罵詈褻言語
子女幼者畢盥櫛正衣服不見驕惰無禮家屢空
或至假貸然後舉火常自裕如不使山陰公知祭
祀必敬而時親戚鄰里有無與同其赴山陰也愈
飭勵壺政常有用獄賄者夫人正言斥之裏外肅
然公終以清名著人謂有陰助焉公卒諸子尚多
幼少夫人辛勤教養以慈以嚴卒能成就遇有
恩慶子姓兄弟俱服服列拜堂下桂林崑玉輝映
成行瑤瓊瑜珥擁立左右鄉里觀者嘖嘖稱歎公

有妾女子母賤將爲人役公歿後夫人捐貲贖而嫁之又業公庶弟尤貧困及孤姪之無依歸者數人而家之奴有異主兄弟怨望者誅奴俱亡奴本無意亡至勢不可已曰忍負我大夫人哉涕泣乃去其慈惠所及如此長男爲丹城縣監丹舊屬山陰夫人曰此汝父桐鄉汝其母忝常以此訓誡丹人迄有兩世之愛乙丑將赴湖南之益山夫人集子婦諸女曰吾以貧故就養與汝等分隔臨年遠行豈吾所樂顧吾湖南人雖死死吾土亦吾心也遂噫噓而別至其年八月遇疾七閱月而甌竟不

起壽七十有二諸子脩禮歸葬噫夫人慧心靈性
豈有所先知者耶亦異哉夫人有九男三女男曰
奉祖司憲府持平曰榮祖弘文校理今爲吉州牧
使卽狀夫人之行耆曰昌祖 敬陵叅奉曰慶祖
生貧曰延祖承文院正字曰應祖兵曹正郎曰念
祖鄉秀才曰述祖大曰崇祖進士女長適李義遵
司穽院叅奉次適張友程次適金起秋內外曾孫
男女一百一十一人別有子孫錄後崇祖繼登文
科爲承政院注書故事五子登科者褒榮其父母
於是 贈山陰公吏曹叅判夫人之封如其秩

遣官致祭焉 國朝二百餘年一母所乳五丈夫
子成大科者厯厯見之而或間以武藝至於俱用
文詞進聯什接武並入臺省如夫人之子者尤所
罕聞嗚呼盛哉觀於夫人之德福善之道豈誣也
哉銘曰

於惟夫人為女女為婦婦為母母宜有九男三女
百孫以享其祉之厚嗚呼銘與石而悠久

价川郡守沈公墓誌銘并序

沈公士訥蚤有名長安中憲少時聞其有氣槩踈
財好義固已心嚮之逮登朝始與相見認為三從

中表弟呼我而呼先君為叔自後相得甚驩有忘
年之契歲戊午憲居戚公亦棄世宿草不哭永負
幽明之為恨也粵十四年庚午公之胤侯隲以家
狀屬余曰先人壙銘尚闕將無以責幽堂請子之
圖之也憲誼不可辭謹按公諱宗敏士訥其字也
系出青松遠祖德符高麗侍中青城伯傳世至諱
安仁慶尚右道兵馬節度使 贈兵曹叅判高祖
也曾祖諱濱安城郡守 贈吏曹判書祖諱光彥
議政府左叅贊考諱錦司憲府監察娶驪興閔氏
郡守希說女驪州尉子芳孫也生公於嘉靖甲寅

其月踰十歲連喪二親持制若成人叅贊公愍而
愛之命仲子進士鎬曰此兒孝可後汝進士公遂
子之稍長器貌寬偉發言處事循循然法家矩度
叅贊公親自提誨動引趙靜庵使為表準公心竊
慕之刮去紉袴習就惕庵企謹恭受小學家禮諸
書又遊閔幸村成牛溪門下二先生皆許與勉進
焉公趨向既定藝業益進中丙子司馬壬午遭本
生後母喪喪畢兄弟從俗分異公自以身承所後
家業讓不受分己丑除北部叅奉不拜進士公疾
革日夜侍側不辭帶者累月有古孝子所難行者

進士公謂人曰此子能如此吾豈恨無兒乎及歿
執喪一如家禮母金夫人憂其過毀常加調護賴
以獲全進士公有側室子性黠難得意公與之同
居推誠體卹卒以善化宗黨咸歸羨焉壬辰之亂
公奉金夫人避兵山林倉卒身自背負數經困苦
歛口之味未嘗之絕轉入閔西行在投造紙署
別提檢察使崔公滉引為從事崔素貴倨少許可
又故事重臣幕僚匪由文塗進者不輕辟而知公
饒幹局行中事無鉅細悉委之果稱職辦乙未丁
金夫人憂服闋授義禁府都事滿遷繕工監直長

改禮賓寺直長隨 皇朝提督李承勛南征還以
勞遷軍資監上簿轉司憲府監察出補漣川縣監
招撫流散民多復業無何病免丙午赴井邑縣監
濟綢憚威明中以蜚語見適庚戌赴山陰縣監抑
豪強理冤獄治民奉公鑿鑿可觀甲寅用薦者拜
戶曹佐郎明年出補利川縣監剋革宿弊導疏壅
闕民大蒙惠方伯上其治特陞通政階賜書褒美
尋陞价川郡守明年病辭還京卒于家壽六十有
五其年八月庚午葬廣州石門里某生新卜之原
夫人具氏附夫人奉常寺正忭之女吏曹佐郎壽

福之孫先公幾年歿初夫人見舅姑里族婦女盛
集進士公素號饒財咸意饋送心錦綺珍寶竟閱
視惟女訓及家範一帙也衆皆歎異之夫人終身
遵奉無違則閨閫之內雍雍如也有一男三女男
長曰俠宗親府典簿曰傑戶曹佐郎善居官女長
適叅議洪瑞翼次適禹祇身次適正郎鄭元奭典
簿娶西川府院君鄭崑壽女生五男一女曰之渙
之湜之傳之淹之渙女適洪柱一佐郎娶奉常寺
正李慶祺女生一男曰之涵叅議二男五女命者
承旨命夏生負女適佐郎金繕掌令林堧生負朴

之恒尹緱其一未行禹祗身二男二女男崇善女
李汝鎮餘幼正郎一男援公資稟豪舉襟量恢疏
友愛兄弟出於天性伯兄家貧無資公奉之如父
時其溫清而衣食之日夕團會怡怡相樂平生任
率無外飾無經營先業之外不喜求益厯典五邑
所到著廉聲喜游江湖間自進士公時家畜聲伎
有亭號集勝勝槩為西湖第一每佳辰風月命儔
引賓以讌以娛樂而有儀為時所豔豈古之所謂
賢豪間人者也子姓繩繩其必有未艾之福歟銘
曰

故壟而違新原而即魂氣流行魄惟斯宅山川發
祥提迺似續百世之下有欲公徵眎此玄石

觀察使姜公墓誌銘并序

公諱燦字德輝始興人始興之姜自新羅著鼻祖
曰餘清事遠不大傳高麗時有為三韓壁上功臣
曰弓珎其後有太尉仁憲公曰邯贊事顯宗位將
相倡議却敵有社稷功初仁憲之生人見大星流
入其室後宋使至見驚曰文曲星在此人益異之
入國朝檢校漢城尹曰楊尹生非熊山陰縣監
縣監生曦吏曹正郎正郎生叔寔承文院判校用

清白褒陞堂上人號清白吏家於公為曾祖祖諱
賚昭格署叅奉 贈左承旨考諱惟慶三登縣令
贈吏曹判書判書初娶竹山安氏無嗣再娶安東
權氏判官諱女也嘉靖丁巳正月甲戌生公性聰
穎自幼嗜學為文詞每出其倫嘗學於金黃岡繼
輝黃岡亟稱其才壬午兩捷司馬癸未登文科選
補承文院權知正字嘗以假注書入侍 上見公
容儀端敏問其居左右以京城人對 上曰然予
固已識之矣俄薦入史館為檢閱又薦為注書
上與講官論陳獻章學術出入詩文累數百言時

陳氏書始出來人多未見公於記注之際不易一字後公改官上曰近日注書惟姜某能任職他人不及也時諸新進爭尚鮮衣公被服儉素同僚或靳之公不少變一日下教責侍臣服色踰制者公獨免焉前靳公者始愧服由注書遷典牲署主簿除目入上恠問之知其以資格拘乃曰不然此人豈宜居此官者也改司憲府監察丁亥遭權夫人喪己丑制畢拜戶曹佐郎遷慶尚都事不赴還戶曹拜司諫院正言適授宗廟署令帶知製教改禮曹正郎司憲府持平鄭汝立謀逆誅朝臣

多連逮鄭彥信實對不實 上怒其欺罔欲考問
南彥經坐請語議者多已甚人莫敢言公以為彥
信嘗備位大臣雖有罪不宜考問彥經亦可原心
擬律多所抹正及爭推官濫勲事甚力人皆避之
拜吏曹侍郎清議以公宜侍經惺再選輒為不悅
者所格歷成均館典籍直講復還禮曹先是湖南
諸生上疏請治逢魁交厚者 上疑其有所受命
鞠之公秉憲與同僚執不可及時論一變因此坐
罷未幾治獄大臣被讒獲罪羣小乘時大逞前憾
盡逐士流斥公端川郡守公至官覓徐賦明號令首

講武藝懸賞用勸歲中皆可以即戎明年壬辰倭
寇覆京都上西幸賊果入止關列城崩潰會寧
民叛執王子宰臣降賊守將多不得保賊勢益
烈公涕泣誓衆移檄道內糾合義旅進與賊戰屢
挫其鋒賊斂避相戒曰端兵可畏亂民亦知畏戢
騎行在隔絕人情洶洶公募死士問道白狀
朝廷聞公之為以為類真卿再出連擢宗簿太常
正兼理郡事又陞通政移拜會寧府使有後命
不赴初王子過端召公責以苛禮公正色曰
君父蒙塵臣子當飲泣爰舍語未卒王子遽漸

悔執公手曰未見爲國竭忠如公者也公自始聞
變恒居外寢惟以治兵討賊爲任他不問端人素
服公至是益感激無異心公不閑跨馬每出必使
兩卒挾鞚而臨陣對敵以身當先戰勝論功一歸
之下以是人人樂爲致死賊退勞徠勸課流民復
業及秋大熟軍食賴饒拜江原道觀察使未至改
承政院同副承旨以前在官治最賜帛序陞右承
旨論者以公功大賞薄議加褒錄用事者沮之不
果行全州缺府尹賊方據海上全爲要害廟堂難
其選上下教曰姜某親冒鋒鏑討賊立功智計

出衆勇必過人無以易此適公病寢其命拜黃海道觀察使撥煩摘伏下不敢欺尋丁判書公憂丙申倭警復急上思公起復拜海州牧使慶尚左道觀察使黃海道節度使兵曹叅議咸鏡南道節度使前後七下召命辭旨愈懇必欲起公而公力辭終喪服闋復授黃海節度使隨天將麻提督往嶺南還以本路兵侍衛王妃世子駐遂安州縣所在匱竭不能給從官公於營中先有儲備以能無乏明年領兵再出嶺南還病免用薦拜江界府使進階嘉善其公者論寢之除海州牧使未

盡月去官百姓追思之公本羸弱居喪已毀病益甚既還里絕仕宦意庚子拜兵曹叅議會國有內喪強起赴朝丐閑西樞復為承旨兵曹又改吏曹關節不到門庭如水移疾罕赴政席喜飲酒飲少輒醉對賓客作吟嚙語若忘世事者而論議之際壁立不倚清仕塗抑僥倖黜貪利附勢無廉恥者數輩輿論快之儕友有薦銓郎者其人頗有時譽同僚皆可公獨否曰得志後必如此果驗公平生鄙竒自獻為人力詆不可用及自獻當路凡可以中傷者無遺計上雅賢公計不得售出為驪

州牧使數月棄官寓延安村舍以疾終癸卯六月初九日也春秋四十七上遣官吊祭賻如儀用公宣武從勲贈嘉善大夫吏曹祭判兼同知經筵義禁府春秋館成均館事弘文館提學世子左副賓客其年八月壬寅從葬衿川縣南鵞房里西向之原夫人金氏祔公居家篤於孝友伯兄有終身疾朝夕省視如事親經營醫藥皆自其躬分已僕與甥姪之無僕者濟人之急甚於己無宅僦屋以居冬月卧敗簣或不能舉火晏如也公在銓曹上命選廉謹公名在其中公曰如此當自効

去同僚不得已遂止常戒家人曰吾忝祿位必不
至餓死分外營生徒為不知命爾公退屏絕人事
端嘿靜坐見者灑然易慮及與人接傾懷輸寫終
日衍衍而未嘗聞其有俗言也遭國亂孤軍抗
敵奮不顧身私屬問避亂計公曰吾已許一死耳
自是不敢復言公自少好栗谷牛溪之學傾心慕
之從宋龜峯翼弼聞為已之方趨向既正浸灌有
素蓋其狷潔之行雖出於天性操履之功得之師
友者為多云夫人光山茂族僉知殷輝之女左議
政國光之後賢有婦道先公一年生卒於甲申生

二男一女長遠期蚤歿次碩期禮曹判書女適沈
馬韓信及側室一女適生負金伯生遠期娶進士
李漳女無子以判書子文朋為後判書娶大司憲
申湜女生五男三女長文星縣監次文明進士次
文斗文壁文井女長適生負鄭泰齊次即王世
子嬪餘未字韓信及一男天金伯生三男二女銘
曰

文曲降精麗運再興厥緒遙遙佳胄乃承蜚英邇
列屈跡邊城遏寇報王忠比真卿遂隆天眷旄
節斯煌䟽乎淖濁玉雪彌光道之或消君子何傷

歸嬴後人乃蕃乃昌始興之原厥位允臧列銘幽壙萬祺攸康

沙溪先生金公墓誌銘

并序

崇禎辛未八月某甲沙溪金先生卒于連山之居第訃聞上命有司舉常典王世子輟講遣宮寮致祭有官者相吊於朝士相吊於野皆曰師友講學之道不可復見矣越三月某甲窆于鎮岑縣北新卜負亥之原門人經而出者填道遠近會葬者至不可數已卯先生舊居之傍建祠而俎豆之學者謂之沙溪書院先生諱長生字希元司憲府

大司憲 贈吏曹判書諱繼輝之嫡子也大父鎬
知禮縣監 贈議政府左贊成曾大父宗胤琬山
郡守 贈兵曹參議其先有新羅王子興光出居
光州子孫蕃昌連八代平章事自高麗至我朝世
有大官判書公歷事 明 宣兩朝文章直道號
爲名臣墓在連山簡易崔空銘其碑官世行治備
述焉其夫人曰平山申氏議政府右參贊夷簡公
瑛之女嘉靖戊申七月生先生生十一歲喪母鞠
於大父自幼性行純篤心無外慕動止自矩及長
師事宋龜峯翼弼又事栗谷李文成公絕意功令

委身於學勤勵嚮進文成甚重之在諸生中期待特深萬曆戊寅先生年三十一朝廷求訪學問篤行之士用薦授 昌陵叅奉從判書公朝 京改敦寧府叅奉壬午丁外憂服闋拜 順陵叅奉又舉才行卓異陞平市署奉事屢拜活人司圃兩署別提司甕院奉事皆病辭拜童蒙教官轉通禮院引儀出爲定山縣監誠信寬惠得吏民心及壬辰之亂策應軍務振卹窮困公私兼濟方伯具聞其狀秩滿陞戶曹正郎監餉湖南還坐事罷僑居海西時寇亂未息士皆廢業先生日與子弟諸生講

論不輟已授丹陽郡守軍資監僉正戶曹正郎楊
根郡守世子翊衛司翊衛俱不拜又除軍資僉
正安城郡守黽俛就官撫摩凋瘵流亡復業以校
正周易召拜宗親府典簿病辭還里已拜益山郡
守三歲免歸久之擢淮陽府使移鐵原光海癸丑
朴應犀誣告獄起先生庶弟一人見逮考死奸黨
竟戮尸將行緣坐以及於先生闔門惴惴或謀所
以紓禍者先生夷然謂曰死生命也終不聽適用
議者事得寢先生杜門鄉廬不交外人惟靜坐佔
俾竟晷今上反正首除司憲府掌令下教曰

予熟聞金某名常願一見其亟召來先生上疏自
陳老病乞解再下溫諭徵以安車不得已力疾
赴命未至御札促召先生入京又辭不許先
生先以書遺靖社諸勲臣勉以謹終始善輔導
革宿弊慎刑辟恢公道戒私昵崇廉耻躬儉約遂
以徹宸覽上愈益嚮之無何親享私廟禮
官儒臣皆謂主上以親孫繼祖於本生無兩考
之嫌祝辭宜稱子大臣亦以爲然先生獨曰禮爲
人後者爲之子雖兄繼弟叔父繼姪皆有父子之
道今主上入繼大統承宣祖之後當依程子

說稱叔姪上疏言之後入侍上虛心傾好先生
概申疏意且自以重聽難於前對先具一劄取懷
中以進陳帝王學問之道聖賢治心之法有云克
私猶恐不猛擴善猶恐不廣上稱善因曰前見
疏辭甚好既已議定不得從之是時上尚未偏
入曲說故其優禮如此適爲司宰監僉正已拜成
均司業前所未置初設以待先生先生以事出非
常力辭不許仍命輔養元子先生又辭不獲
進講之際隨事規箴元子深致敬焉無何以老
告歸屢請始許往還及抵家條上民瘼下諭促

還先生不赴復上疏進誠心謹獨之說甲子李适
叛上幸公州先生道謁賊平有教隨駕還
京授尚衣院正擢司憲府執義未久復歸連山上
萬言書立大本盡聖孝親九族體羣臣等十三條
上褒納特授工曹叅議先生上疏辭恩且言憲
府禁治內奴政院封還傳旨皆奉法守職不宜摧
譴借曰奉承慈教實由私意未祛害政滋多
上優答命召之先生入謝遂臣有建請許赴
經筵進講元子勿以官階為拘皆可之明年冊
立世子進拜同知中樞府事尋乞暇上塚臨行

上疏請奮發大志益進聖學絕偏係戒優游兼陳
用人接下納諫敬賢博訪精擇之道言益懇切明
年上遭啓運宮喪先生上京進慰即歸政院請
留報未下而先生已行矣初服制未定廷議紛紜
上定為齊衰杖期先生上言於古禮無裾報聞先
是有朴知誠者上疏宜倣母后儀羣臣從服又倡
為禰廟之論其徒受指相繼投匭專主追崇與李
貴崔鳴吉合雜引枝辭以動上意先生以為此
古今變禮一有差誤貽譏後世乃參互經傳反覆
論辨或疏或書累千百言大抵以承繼大統為重

崇奉私親為非由是 上寢不悅異論者亦多詆
訾而先生終無少變丁卯西虜深入 上移蹕江
都以先生為號召使先生聞 命扶病出境糾合
同志招兵聚糧湊給 行在身隨 東宮往金州
訛言賊漸逗遛議移避人心大震先生力主輕動
非計入見 世子言之乃定無何詣江都 起居
上引見勞問先生請解職歸鄉里 上慰勉許歸
不聽辭先生仍陳斥和者被譴恐後無言者明年
拜刑曹叅判辭不就 會 上御經筵曰金長生張
顯光皆宿德之人不肯久留何以則可致大臣有

請加殊禮即下 召旨安車即路先生上疏固辭
御批丁寧廢予備至先生終不起於是先生年八
十三以大耄優 恩進階嘉義大夫至明年秋易簀
先生素強無疾病前數月偶患風濕少損猶不廢
講學臨終神氣不亂翛然而逝先生天資謙恭仁
厚自然近道蚤得師門直尋正路不驚高遠不斲
少成進學工程一以程朱為法非聖賢之書不見
蚤夜孜孜殆忘寢食一切世味紛華泊然無所好
堅持力行篤信自守晚年造詣益深考其日用言
為就而驗之心身之間純如也尤邃於禮學先儒

箋註醇疵異同無不攷證會通變禮難處必附經
義折衷一時叩質者皆歸焉教人為學先立本體
隨其才品多所成就兩湖學子循循謹飭者見之
人知其為先生門下常謂吾東方理學倡於鄭圃
隱我朝金寒暄繼其墜緒而猶未暢至趙文正李
文純其功大矣而明白純粹洞澈無滓真知實踐
得其宗旨無如栗谷文成公云一家之內孝友敦
睦未嘗有不可法者栗谷之喪制服以居忌日齋
素視其子如子於龜峯亦然為鄭松江澈力辨誣
蔑不為一身利害計對人溫溫不見圭角至於論

事是非分判淑慝嚴辭正色確然不可動居官不求聲譽去後民自不忘所著經書辨疑八卷疑禮問解八卷近思錄釋疑一卷家禮集覽二卷書疏雜錄若干卷藏于家喪禮備要一卷刊行於世夫人昌寧曹氏僉知中樞府事大乾之女判敦寧府事贈領議政光遠之孫甚有婦德年三十六萬曆丙戌卒葬舅姑宅次玄軒申公欽為壙銘崇禎壬申遷祔先生墓生三男三女長隱蚤歿次集都事飭躬砥行能守庭訓次槃與翰女適監察徐景霽次天次郡守韓德及側室有男六女二人曰榮生

負曰繁杲渠渠裴女適李栖李名鎮都事無子側
出益炯益煉生負女適生負金泰立鄭廣源典翰
六男四女曰益烈監役益熙檢閱益兼餘幼女適
郡守李瀉次郡守李厚源進士張次周李海寬適
慎暲成璫者徐出也進士壽遠智遠適李汝洪金
敏成李時挺者韓出也榮四男一女繁二男杲一
男二女渠二男一女内外曾孫若干人銘曰
猗歟先生學傳栗翁秉資醇深勤以有功雅言執
禮確乎始終欽于士林振我儒風岑城之野罔如
幽宮我銘不愧惟郭林宗

柳君晦甫墓誌銘并序

柳君諱燦字晦甫萬曆丙辰歲鮮葬桂陽之某山
先人墓次越八年癸亥國家反正誅奸雪誣於
是贈君司憲府持平未幾以其子原從功加

贈嘉善大夫吏曹叅判兼同知義禁府事又幾年
某歲某月改卜忠州某里某山某向之原與貞夫
人崔氏合葬焉夫人之父曰觀察使沂高麗文獻
公冲之後觀察當光海時為海州牧使是時李爾
瞻與朴承宗等交惡欲專大柄導昏主將廢母
后連起大獄百計上浸適州人朴希一朴以彬等

得罪不容入京城爾瞻聞之與其黨韓續男許
筠謀作上變書盡置所欲去者其中引希一等密
語爲約希一等受指歸家未及發其父兄知之舉
前惡詣府請罪處以大義爾瞻等遣其徒脇監司
上其事諷言路反爲逆徒地淫刑殺之覆其家衆
庶稱冤續男以刑房承旨掌獄名請逮君君在獄
筠欲証成之潛以書誅如此轉禍爲福君素剛旣
深嫉奸人所爲重哀崔公冤死冀光海萬有一悟
遂盡暴其狀奸黨大愕固請考問脩受楚毒竟死
獄中臨死神氣不亂遺書其子勉以爲善毋怠處


家事甚悉解衣與同繫趙直士漫爲別言論慷慨
如常日見者莫不哀傷杓韓續男爲其子請婚君
嘻笑曰吾女與某子爲婦耶續男聞之甚銜禍果
慙君爲人秀整風岸孤峭耿介過人鼻祖車達高
麗辟上功臣文化人其後有徙居晉陽者遂爲晉
陽人六世祖順汀以靖國功官至領議政封菁川
府院君祖諱浚軍資監正考諱重光司憲府監察
贈左承旨娶典籤丁胤祚女贊成應斗之孫丁丑
某月某甲生君生有孝性六歲喪母哭泣甚哀壬
辰之亂從大父于清風任所夢承旨公爲賊所窘

即悲泣却肉不食夜則焚香禱天及喪哀痛絕而
復甦已請于大父從軍復讐大父心異之愍其幼
弱不許與兄妹友愛於財無所吝一順其意自奉
簡儉為人甚於為己與人許交堅持一心言出於
口後雖不利己不悔泮宮壁書之獄被繫者親故
不敢問權輶中詩禍死林檎遭誣告入獄人皆避
之君獨省視加厚人以此多之少習舉子業屢舉
不遂見世道日變不樂進取筭室鄉曲與鄰好劇
飲縱譁以自適或勸之仕曰吾守先人遺業終於
此足矣安能詘辱於權貴人哉君再娶前夫人崔

氏生一男一女男時英高靈縣監女適士人李碩
平後夫人俞氏杞溪望族生一男時發未娶而夭
側室一男時蕃高靈二男二女萬金百金女適安
廷燭餘幼崔夫人誠孝婉嫕通經史識大義為子
為婦咸得其道俞夫人亦和順慈愛閨壺之內藹
如也人謂高靈之善事繼母夫人之視同己出皆
可為令範云嗚呼君平生好名義勇於為人遭時
不淑禍及其身哀哉銘曰

志剛而氣銳言直而行方謂必逢其臧而反迎其
殃運極理復天道之常嗟躬已矣後嗣之昌

清陰先生集卷之三十三



集

隆

道

丹